



CONTECURTE OSTARIE LETERARIE
DI POCJS PERAULIS

La Stagjon des Contis

Une competizion dulà che si sfidisi
a colps di contis curtis

Ogni mês un teme

Une conte di mandâ

Une classifiche che si inzorne

Tantis storiis di scrivi e di lei

Une jurie tecniche e il judizi dai letôrs

Un Campion par ogni Stagjon

Un Campion dai Campions, un Premi Finâl

Une maniere par impegnâsi a fâ alc di biel

Par stiçâ la creativitât dilunc dal an

Par scrivi par furlan e contâ storiis

Par tignî vive la Ostarie di Consecurte

ISCRIVITI ANCJE TU!

Mande une mail a consecurte@gmail.com

La Corse Curte e je in partence

La stagjon des contis e sta par scomençâ!

REGOLAMENT

- DENTRI DI OGNI FIN DAL MÊS SI À DI SCRIVI UNE CONTE CURTE DI MANCUL DI 2000 BATUDIS, COMPRENDÛTS I SPAZIS.
- LA COMPETIZION E JE **VIERTE A DUCJ**, ANCJE A CHEI CHE NO SON USÂTS A SCRIVI PAR FURLAN. L'OSTÎR AL DARÀ UNE MAN INTE GRAFIE.
- A INIZI MÊS AL VIGNARÀ DÂT UN **TEME GJENERIC**; OGNI MÊS AL CORISPPOINT A UNE ZORNADE DI CAMPIONÂT, TANT CHE IL BALON.
- UNE JURIE TECNICHE (RAFAËL SERAFIN, ZUANLUCHE FRANC, CARLI PUP) E VALUTARÀ LIS CONTIS E E FASARÀ LA CLASSIFICHE. LA ULTIME CONTE E CJAPE 1 PONT, LA PRIME I PONTS DAL NUMAR DAI PARTECIPANTS, PLUI 1 DI BONUS.
- LIS CONTIS A VIGNARAN PUBLICADIS SUBIT SUL SÎT DI CONTECURTE E **LA JURIE DAI LETÔRS** E VARÀ TEMP FIN AI 15 DAL MÊS DOPO PAR VOTÂ LA CONTE CHE I PLÂS DI PLUI, CHE E CJAPARÀ 3 PONTS (1 IN CÂS DI PARITÂT). CUI CHE AL VOTE CUNTUN COMENT E LU FIRME AL PARTECIPE AL FANTA-CORSECURTE.
- NOL È UN OBLIC, MA AL **SARÈS BIÉL** CHE I CONCORINTS A LEIESSIN LIS CONTIS DAI AVERSARIS E A VOTASSIN ANCJE LÔR, TANT CHE LETÔRS.
- AI 16 DI OGNI MÊS LA CLASSIFICHE **GJENERÂL** SI INZORNE METINT DONGJE JURIE TECNICHE E LETÔRS. OGNI STAGJON - INVIER, VIERTE, ISTÂT, SIERADE - E VARÀ IL SO VINCIDÔR. INTAL ZENÂR DAL 2023 AL VIGNARÀ PROCLAMÂT ANCJE CUI CHE AL È **IL CAMPION DAI CAMPIONS DI CORSE CURTE**.
- PAR PARTECIPÂ SI À DI SIELZI UN NON DI GARE (P.E. DINAMO DINDI, ATLETIC RINDUL, REÂL PICJECJACIS, PALISSE UNITED E V.I. ...) CUSSÌ CHE NO SI INFLUENCE I LETÔRS E SI DIVERTISSISI DI PLUI. DOPRAIT LA FANTASIE!
- SE UN CONCORINT NOL CUMBINE A MANDÂ LA CONTE, NISSUN FASTIDI, TA CHEL MÊS NOL CJAPARÀ PONTS.
- LA CONTE E PUÈS JESSI PLUI LUNGJE DAL LIMIT, MA OGNI 100 BATUDIS IN PLUI SI PIERT UN PONT.
- SI PUÈS **JENTRÂ IN GARE** ANCJE A CAMPIONÂT ZA TACÂT, SCONTANT IL PRESIT DI JENTRÂ CUI PONTS DAL ULTIN IN CLASSIFICHE IN CHEL MOMENT.
- I PREMIS PAI VINCIDÔRS - FINÂL E DI STAGJON - A SARAN DISVELÂTS DI MAN IN MAN. IL CAMPION DAI CAMPIONS DI CORSE CURTE AL VARÀ **LA CENE PAIADE** INTE FIESTE FINÂL CHE O FASARÌN TAL ZENÂR DAL 2023
- CORSE CURTE E SOMEE UNE COMPETIZION, MA **AL È UN ZÛC**, UNE MANIERE DI TIGNÎ VIVE LA CREATIVITÂT E LA MARILENGHE, PAR SBURTÂSI A SCRIVI CONTIS E CJAPÂSI IL GUST DI FÂ ALC DI BIÉL INSIEMI.

DOMANDIS E RISPUESTIS

🕒 **Mi plasarès tant partecipâ, ma no soi sigûr di rivâ a scrivi ogni mês une conte...**

E ce probleme isal? Ta chel mês no tu scrivis nuie e tu cjapis zero ponts, amen. O pûr tu scrivis une fufigne di cualchi rie, tant pe presince, e cuissà, magari ultin no tu rivis e si cjape cualchi pont istès... In sumis, al è propit biel jessi ancje cuant che un mês no si è ispirâts o no si à temp.

🕒 **A mi mi va di partecipâ, ma no ai tante voie di impegnâmi, puedio istès?**

Ma cjale... o disarès ancjemò miôr. Tal sens che al è biel vê ancje cui che al partecipe cence spirt competitîf, juste pal gust di scrivi alc par furlan, fossial ancje cualchi rie mât bastide, o magari dome par imparâ o sburtâsi a scrivi par furlan, cence fâsi cjapâ de sflacje. In sumis... sì!

🕒 **E se il teme no mi plâs? O no mi ven nuie tal cjâf?**

Dificil che al sucedi. Il teme al sarà simpri une vore gjeneric, di maniere che si puedi interpretâ in tantis manieris. E cuant che si à un teme tal cjâf, cualchi idee e rive simpri.

🕒 **Aio di sielzi par scugnî un non che al ricuardi une scuadre di balon?**

Nuuuu! Posisappo! E je dome une maniere par divertîsi e fâ fente che al sedi un championât di contis. Si pues sielzi cualsisei non, baste che al sedi figo e che nol disveli il vêr non dal partecipant.

🕒 **Ma si puedie savê miôr i temps par scrivi e votâ?**

Alore... I temps a son plui o mancul chescj. Par cui che al scrîf, ai 5 dal mês o publichìn la liste des contis rivadis tal mês prime e il teme pal mês dopo. Si à temp di li fintremai ae fin dal mês par mandâ la conte. Par cui che al lei, invezit, dai 2 ai 5 dal mês o publichìn lis contis sul sít, e dai 5 ai 15 si pues votâ la conte che si à miôr, par fâ part de jurie dal public e partecipâ al FantaCorseCurte.

🕒 **Ma cemût si votie?**

Facil, dopo vê let lis contis, si sielç chê che si à miôr e si lu scrîf intun coment al post dulà che e je la liste des contis di chel mês.

🕒 **Ma par votâ si saial cui che al à scrit la conte?**

Fin ae publicazion de classifiche, no si sa. Dopo dai 15 o metarìn i nons dai concorints, cussì cui che al vote (e al scomet) lu fâs su la conte e no su la scuadre.

🕒 **Ce isal il FantaCorseCurte?**

Cuant che un al vote lis contis e al sielç chê che i plâs di plui, in pratiche al scomet su la conte, come se al fos un cjalval intune corse, si che, al cjaparà ancje lui i ponts che e cjape chê conte. Baste comentâ simpri cun chel non e ve li, che o varin une classifiche dai letôrs... il FantaCorseCurte!

🕒 **Aio di scugnî disvelâ il gno non, ae fin dal an?**

Ma cjale... se tu âs voie di vê la cene paiade, sì; ma se no ti va, nissun fastidi. Al baste che lu sepi l'Ostîr cuant che tu ti iscrivis, che al tignarà ben platât i nons fin ae fin de competizion, o ancje par simpri.

🕒 **E se si iscrivin in tancj e e salte fûr une sdrume di contis di lei?**

Magari! Sarès bielonon! E nol sarès nissun fastidi... Fasarìn doi zirons!